



Cun in clar gèst muossa Gioela-Samina tgei ch'ella tratga dil virus.

«Sco in pign ball cun eglis che seglia entuorn»

Ina viseta als 15 scolarets dalla scoletta a Trun ed a lur mussadra Rita Tiri

DA SUSI ROTHMUND/FMR

■ **Corona cheu, corona leu – igl ei strusch pusseivel pli d'untgir e d'udir in entir di nuot da quei virus che ha midau la veta da nus tuts. Semidada ei la situaziun era pils affons e perquei havein nus fatg ina viseta ella scoletta a Trun, per sentir empau il puls dils pignets e schar raquintar co ei vesan quei cul virus.** Mardis avonmiezdi, enzacontas minutas vargau las 9.00 ella scoletta a Trun: 15 buobas e buobs termaglian ni ein vid zambergiar ina sorpresa pils geniturs. Igl esch dalla stanza ei aviarts e strusch ch'els pignets vesan la redactura cun mascrina entscheiva ina buobetta a raquintar: «Jeu hai era ina mascra a casa...ell'ei en mia combra.»

Prompt vul in suenter l'auter raquintar dallas mascras ch'ei han e nus essan senza vuler gia tiel tema. «Rita, Rita, Rita...», cloman tuts ensemen. «Mira tgei ch'ei vegniu.» Bein savevan ei ch'enzatgi dalla gasetta vegni a far ina viseta, mo ils pignets enconuschan probabla-mein buc la dunna culla mascrina. Las buobas paran bunamein sollevgiadas da saver confidar ad enzatgi il misteri da quei ch'ei zambregian, a casa astgan ei numnadamein dir nuot a negin.

Mascras era en scoletta

Suenter in mument seplaccan tuts el rudi sin lur pintgas surgas da lenn, cun distanza sesan era la mussadra e la schurnalista el rudi. «Ussa savein nus schon prender giu las mascras, schiglioc vesan ei buc nossa mimica e capeschan buca bein quei che nus schein», di Rita Tiri e nies surrir vegn immediat rispundius, ils affons paran bunamein in stel sollevgiat, era sch'els ein atgnamein gia disai vid quei battegl. La mussadra porta numnadamein mascrina sch'ella sa buca tener en la distanza. Il Consorzi da scola Sumvitg-Trun ha publicau las mesiras e reglas en connex cul coronavirus silla pagina d'internet. Aschia san ils geniturs s'orientar e sco Rita Tiri di, detti ei buc massa damondas arisguardar la pandemia e co secuntener.

Eglis pigns e combas che taccan

Enten paterlar essan nus spert tiel tema Sontgaclau, tgei manegia ch'el vegni e tgei plitost buc. Auters paran gia da saver ch'el metta uonn semplamein in pac avon esch, plascher havessen ei denton d'ina viseta. Perquei declara Rita ch'ella stoppi aunc scriver al Sontgaclau e sclarir quei cun el. Mo daco duess el atgnamein buca vegnir uonn? «Oh pervia dil corona», tuni sco en in chor ord il rudi e la redactura giavischina ina descripziun da quei cumpogn. «Quei

ei in pign rudi che vesa ora sco in ball, el ha eglis pigns e seglia», declara Aurel e Nicola aschunta: «El va sin tuts e perquei astg'ins buca dar il maun e sto metter si mascra e selavar...il corona ei pigns ed ha pigns peis che san taccar. Ei ha uuu biars sigl entir, entir mund.» Luana precisascha: «Nus stuein adina selavar ils mauns cun savun e nus vegnin en scoletta, suenter pausa ed avon ch'ir a casa.» La buobetta ha perfin in cussegl co far per buca stuer sturnidar: «Ti stoss furschar cun in det sut il nas vi... hmmm...aber cun mascra va quei buc.» Ed in'autra buobetta aschunta ch'ins audi buc endretg tgei che quels cun mascra raquentien. Era Marc Aurel sa exact co il virus vesa ora: «Quei ei in pign ball cun eglis, buca e nas e massa festa che mira ora. Mia sora ha in ball che vesa ora sco in corona.» «Mes geniturs han si mascras neris cu ei lavuran ell'ustria, quei ei mitgiert», manegia ina buobetta.

Amitg(as) mauncan

Gioela-Samina sa era daco ch'ins sto haver quita: «Cun corona san ins vegnir malsaus, quels seglian entuorn. Perquei asgtein nus buca parter nossa pausa e dar il maun.» Plein temperament e fagend risadas seglian ils pigns en pei, van dad in tier l'auter e muossan co ei salidan, culs cumbels ni cun «namaste». Sco ils scolarets ra-

quentan, sappien ei ussa era buc envidar tons amitgs a natalezis, quei plai buc aschi bein ad els. Pauc plascher han ei giu da star a casa duront il lockdown. Ei raquentan ch'ei fussien bia pli bugen vegni en scoletta. «Quei era tuppura, jeu mon aschi bugen a scoletta, mo igl ei halt stau pli impurtont d'haver quita», manegia Luana e raquentan che la mumma hagi per cletg giu massa bunas ideas da zambergiar a casa. Era la mussadra ha tarmess ad els pensums e salids a casa, aschia ha ei semegliu empau pli cuort. Puspei turnai en scola leva Rita Tiri discuorer cun ses scolarets dil coronavirus. Quei hagian ei lu era fatg in mument, il desideru da termagliar e puspei guder ils cumpogns eri denton gronds e perquei hagi ella teniu cuort il discuosr igl emprem di. Il coronavirus fatschenta ils pignets e Luca di: «Sch'ins ha in text positiv ston ins star en ina combra ed astga vegnir ora mo per ir sin tualetta.» La redactura vul saver sch'ei seigien era gia stai en curontina. «Naaaa», cloman ei puspei el chor. Aurel manegia ch'ei fussi bien da better aua dapertut, per ch'il virus mondi naven: «Lein buca far il giug dalla lieuretta?» excloma ina buobetta. Els ein unfis da discuorer dil virus e quei ei en uorden. En in ghen ein tuts giun plaun e cantan: «La lieuretta dorma...» Tgei cletg, il mund para d'esser en uorden.



Termagliar e far giugs ei quei che plai als scolarets dalla scoletta a Trun ch'ei ein plein temperament.



En discuosr davart corona paran las fatschas dils scolarets pulit seriusas.

FOTOS SUSI ROTHMUND

MUSTÉR

Las lavurs vid via historica san cuntinuar

(rtr/fmr) Il settember da quest onn veva il tribunal administrativ dil Grischun decretau in stop da baghegiar superprovisoric, quei suenter che la Protecziun dalla patria haveva intervegniu encunter il project dalla construziun, resp. dil slargiamet dalla via. La via denter Disla e Madernal seigi ina via historica ch'ins astgi buca slargiar, havevan ils recurrents giu argumentat. Denter quels eran Leo Tuor, Giusep Nay e Köbi Gantenbein stai. Dacuort ha la dertgira administrativa denton scassau il stop da baghegiar superprovisoric. «Las lavurs vid la via san pia cuntinuar», di Walter Deplazes, igl inschignier incaricau dalla vischnaunca da Mustér e quei cun rugalar il mir schetg e slargiar la via sco quei ch'ei era vegniu approbau el project. La menadra da fatschenta dalla Protecziun dalla patria, Ludmila Seifert, ei trumpada. Quei ch'els han buca vuliu tradir el mument ei sch'els vulan trer vinavon il cass al Tribunal federal.

MUSTÉR/SEDRUN

S'annunziar per la cuorsa dalla tgina dil Rein

(fmr/ac) Ils organisaturs dalla cuorsa dalla Tgina dil Rein han aviart la porta d'annunzia per il proxim trail planisau il 10 da februar 2021. Sco ils organisaturs scrivan en ina comunicaziun, ei il diember da participants limitaun pil mument sin 500 curridras e curriders. Per cass che las duas diversas cuorsas ston vegnir annulladas ni sche restricziuns da viadi ni curontina impedeschan da separitar alla cuorsa, offereschan ils organisaturs ina assicuranza per ina mudesta summa. La segirada lubescha da restituir il daner da partenza. Sin fundament da diversas reacziuns da curridras e curriders han ils organisaturs annunziun singulas adattaziuns vid ils dus tschancuns da cuorsa ed enteifer l'organizaziun dil trail dalla Tgina dil Rein 2021. Ellas vegnan presentadas el decuosr dil proxim meins.

FOPPA

Mutaziuns ella Platta Pussenta

(cm/fmr) La Fundaziun Platta Pussenta s'engascha dapi gl'onn 2007 per la tgira dalla cuntrada e natira ellas vischnauncas da Falera, Laax, Sagogn e Schluein. Quei onn ei in cussegl da fundaziun seformaus cugl intent da cuntinuar las incumbensas ch'in project Platta Pussenta haveva instradau sin onns avon. Pervia dalla pandemia da corona ha il cussegl da fundaziun saviu approbar per dacuort il rapport annual 2019. Quel menziuna las diversas lavurs ch'il cussegl ha organisau e ch'el vegn ad organisar vinavon. Il scalem superiur dalla scolaviva dallas quater vischnauncas e las scolas primaras da Sagogn e Schluein s'engaschan regularmeint mintg'onn cun acziuns da lavur cumina per la cuntrada cultivada. En ina sesida da margis vargau ha il cussegl da fundaziun priu notizia da diversas mutaziuns en siu gremi. Christian Buchli succeda igl 1. da schaner 2021 sco president niev e successur dad Augustin Beeli. Quel ha fatg part dil cussegl dapi 2007, dapi 2012 sco president. Sortius dil gremi ei era Erwin Schmid sco representant da Laax. Per el ha il cussegl saviu gudignar Corsin Caduff. Plinavon ha Raimund Blumenthal da Falera demissionau suenter esser staus engaschats dapi l'entschatta, gl'emprem el project e lu el cussegl da fundaziun. Sco representant da Falera rempiazza el da niev Orlando Steiner. Actualmeint ei quel commember dalla suprastanza communal e gerau dil turissem. Niev representant da Sagogn daventa cull'entschatta dil 2021 Fadri Beeli, da professiun selvicultur. Il mandat da meinagestium ha la Fundaziun Platta Pussenta saviu surdar l'entschatta dil 2020 alla ecologa digl ambient Murièle Jonglez, sesenta a Riein.